



9. marts 2012

UPA2012/123

Inatsisartut suleriaasianni § 33 naapertorlugu aalajangiiffigisassatut siunnersuut imaattoq saqqummiuppara:

2013-imi atuutilersussanik ilaasunik angallassineq pillugu sullissinissamik isumaqatiginninniarnertit atuutilersussat manna ingerlanneqartunut atatillugu nunatta kujataani piffissani sikorsuaqanngiffinni umiarsuit atorlugit ilaasunik angallassisinnaaneq, ukiullu sinnerani qulimiguullit atorlugit ilaasunik angallassisinnaaneq pillugu isumaqatigiissuteqarsinnaanermik Naalakkersuisut misissuinissamik peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaqaq Anders Olsen, Siumut)

Tunngavilersuut:

Nunatta kujataani angallannermut periarfissat innersuussutigalugit, isumaqarpunga ilaasunik angallassinerup nutaamik nalilersornissaanut piffissanngortoq.

Manna tikillugu piffimmit piffimmut angalassagaanni, tamanna assersuutigalugu nammineq angallat atorlugu pissanngippat, taamaallaat qulimiguulik atorlugu pisinnaavoq.

Ukiorpasuarni umiarsuit ilaasartaatit atorlugit angalasoqarsinnaasarpoq amerlasuunit atorluarneqartaqisumik. Periarfissarli tamanna 2006-ip kingorna ataasiinnarmik sammivilimmik angallannermut tunngatillugu tapiissuteqartalerikkut atorunnaarsinneqarpoq, taamaalillunilu angallasseriaatsip ataasiinnaap atulerneratigut ilaasunik angallassineq tamarmi qulimiguullit atorlugit ingerlanneqalerluni.

Umiarsuit ilaasartaatinut ilaasinnaanermut periarfissap atorunnaarsinneqarnerata kingorna innuttat amerlasuut periarfissaq taamaattoq maqaasivaat, periarfissallu taamaattup atuutilerseqqinneqarnissaa kissaatigalugu.

Qulimiguullit atorlugit angalassagaanni tamanna taamaallaat billetimik akisoqisumik pisilluni aatsaat pisinnaavoq, naak ullumikkut inuuniarnikkut aningaasartuutit qaffasereeqisut aamma nammatassaagaluartut. Qulimiguullit atorlugit angallanneqarsinnaaneq annikeqisumik atorneqartoq qiviaraanni, tamanna pissutsit qanoq pitsaanngitsiginerinek takutitsisoq isiginngitsuusaaginnaarsinaanngilarput.

Taamaammat isumaqarpunga nunatta kujataani ullumikkornit eqaannerusumik akikinnerusumillu angallassisinnaanermik nutaamik aqutissiussisariaqartugut, misissuinerimmi tamarmik umiarsuarmik angallassinerup qulimiguulinnik angallassinerup sanilliullugu akikinnerunera takutimassuk. Nunatta kujataa piffissami sikorsuaqanngiffimmi umiarsuaaqanik minnerusunik sullinneqarluni ukiup sinnera qulimiguulimmik sullinneqarpat, tamanna inuiaqatigiit aningaasaqarnerannut atatillugu pitsaaquteqassasoq angallanneq pillugu isumalioqatigiisitaq isumaliutissiissutimini immikkoortoq 7.7.5-imi allappoq. Taamatuttaaq taama iliornikkut

eqaannerusumik periuseqartoqarlunilu aningaasanik ileqqaartoqassasoq isumalioqatigiisitaq immikkoortumi tassani aamma allappoq.

Innuttat maani najugallit siunnersuutip uuma iluaqutissartaanik kisimik iluaquserneqartussaanginnerat eqqaamassavarput, maannali pissutsit atuuttut takutippaat takornariat amerlasuut nunatta kujataata ullumikkut angallannikkut eqarpallaamik aaqqissuussivigineqarnera pissutigalugu ormissanagu aalajangertartut. Taamaammallu siunnersuummik uannga piviusunngortitsineq aamma takornariatitsinermik inuussutissarsiuteqartunut amerlanerusunik periarfissiillunilu amerlanerusunik neqeroorsinnaalernermik kinguneqassasoq ilimagisinnaavarput.

Umiarsuit siusinnerusukkut nunatta kujataani ilaasunik angallassinermut atorneqartarsimasunut tunngatillugu, nunatta kujataani umiarsuarnik ilaasunik angallassinernup eqquteqqinneqarnissaanut atatillugu, angallatit qanoq ittut atorneqarnissaat nalilissallugu pissusissamisuuksaaq. Umiarsuimmi anginerit minnernut sanilliullugit ingerlatsinikkut annerusumik aningaasartuuteqarfiunissaat ilimagineqarsinnaavoq, taamatuttaarlu umiarsuit anginerit minnernit kigaannerusumik ingerlaarnissaat ilimagineqarsinnaavoq. Illuatugaagulli umiarsuit minnerusut sukkanerusumik ingerlaarsinnaapput taamaalillutillu piffinnut assigiinngitsunut tikilertorsinnaanerullutik, naak taakku anginernut sanilliullutik ilorrisimaarnanginnerusinnaassagaluartut. Taamaaliornikkullu periarfissat sukumiisumik nalilersortariaqarnerat avaqunneqarsinnaanaviannigilaq.

Ilaasunik angallassineq pillugu sullissinissamik isumaqatigiissutip qanittumi nutarternissaanut atatillugu angallasseriaatsip nutaamik eqqarsaatigeqqinneqarnissaa pingaaruteqarpoq. Erseqqissaatigeqqissavarattaq Taamattaq angallanneq pillugu isumalioqatigiisitaq siorna isumaliutissiissummi saqqummiussaani siunnersuutip uuma siunertaanut qanittunik periarfissanik kaammattuuteqarnera erseqqissaatigeqqissavara, taamaammallu siunnersuutip uuma amerlanerusuteqarluartunit taparserneqarnissaa kissaatigaara.

Siunnersuutip pisortanut aningaasatigut allaffissornikkullu kinguneqaatissat

Siunertamut aningaasanik allaffissornermilu isumalluutininik immikkoortitsisoqartussaanera pissutigalugu siunnersuut akuersissutigineqassappat allaffissornermut aningaasartuutininik nassataqassaaq. Aningaasartuutilli maanna aningaasaliissutaareesutigut matussuserneqarsinnaanerat naliliutaavoq, angallasseqatigiiffinummi isumaqatiginninniarnissamut aningaasanik immikkoortitsisoqareemat. Taamatuttaaq Aningaasanut Inatsimmi konto pingaarnermi 87.11.09 *Angallanneq pillugu isumalioqatigiisitaq – misissueqqaarnerit* – Angallanneq pillugu isumalioqatigiisitaq isumaliutissiissutaani suliniutit malitseqartinneqarnissaannut ukiumut 5 mio. kr.-it immikkoortinneqartarput.

2012-imut Aningaasanut Inatsimmi konto pingaarneq 73.01.08 *Ilaasunik angallassinermut tapiissutit*, nunatta kujataani ilaasunik angallassinermut ukiumut 22,5 mio. kr.-inik tapiissutissat immikkoortinneqareerput. Aningaasat taakku qulimiguullit umiarsuillu atorlugit ilaasunik angallassinermut akiliutitut atorneqassapput. Naalakkersuisut angalatitseqatigiiffinnik isumaqatiginninniarnerminni qulimiguulimmik umiarsuarmillu ilaasunik angallassinermi ataatsimut aningaasartuutit aningaasaliissutit atorlugit pinissaat isumaginiassavaat. Aasaanerani qulimiguullit atorlugit angallassinernup ileqqaarfiussammat tamanna periarfissaassaaq, ileqqaarutigineqartullu taakku umiarsuit atorlugit ilaasunik angallassinermut atatillugu sullissinissamut isumaqatigiissusiornermut atorneqarsinnaassapput. Tunngavik taanna aamma Angallanneq pillugu isumalioqatigiisitaq naliliutaani aamma allassimavoq.

Erseqqissaatigineqassarli namminersorlutik ingerlatsisut niuernermi pissutsit nalinginnaasut atorlugit pisortanit ataavartumik ingerlatsinermut tapiissutininik pissarsisarnatik umiarsuit atorlugit ilaasunik angallassinermik ingerlatsisinnaappata tamanna soorunami pitsaanersaassasoq. Matumani Qeqertarsuup tunuani Diskolinip misilittagai qimerluualarneqarsinnaapput.

Siunnersuutip innuttanut aningaasaqarnikkut allaffissornikkullu kinguneqaatissat

Soqanngilaq. Naalakkersuisut angallasseqatigiiffinnik isumaqatiginninniarnarat innuttaasunut iluaqutsiisumik angusaqarfiussappat, taava innuttat nunatta kujataani assigiinngiiaanerusumik angallanneqarsinnaalissapput.

Siunnersuutip inuussutissarsiortunut aningaasatigut allaffissornikkullu kinguneqaatissat

Soqanngilaq. Naalakkersuisut angallasseqatigiiffinnik isumaqatiginninniarnarat pitsaasumik inerneqassappat, piffimmi angallataatillit ilaasunik angallassinissaq pillugu Namminersorlutik Oqartussanik isumaqatigiissuteqarsinnaalissapput, taamaalillutillu iluanaaruteqarlutik.